

Dörfligeischer 1988

Bilder male, Värse schmiede, Kostüm näie,
U nächhär mit däm Züüg vo Beiz zu Beiz go chräie,
Das tüe mir hüür mit em ne Jubiläum fiire,
Sit vierzig Johr tüe d' Dörfligeischer so marschiere !

Als Geischer sy mir halt doch Wäse ohni Schale,
Dass me üs gseht, müesse mir es Liintuech bemale,
U wüu mir Gschpängster kei Materie besitze,
Bringt üs der gröshti Börsekrach ou nid i ds Schwitze !

Plötzlech erfasst üses Land e-n-Art Hysterie,
Sit Johre heig's im Vacherin Mont d'Or zviu Bakterie,
Me wüss' worum ds Franzose-Heer bi Grandson isch gschorbe,
Si heig sech d' Mäge a däm Schwyzer Chäs verdorbe !

Bim FC Biel, do stellt me fescht: E Schwarzarbeiter !
Zum Glück sy d' Young Boys Bärn für d' Bieler Wägbereiter,
Denn d' Fömdepolizei macht jetz für beid' Klüb ds Gliiche,
Und tuet die Schwzarbeiter eifach wyss astryche !

Jetz git's doch z' Bärn so Lüt, wo ganz bescheide wöu läbe,
Doch tüe si chlaue und verlange no Land vergäbe,
Mir hei e Vorschlag für die Brüeder vom Zaffaraya,
O schicket se doch zum Yeti uf e Himalaya !

Dass ds Sunntigsblatt ygange isch, erfüllt üs mit Schmärze,
Nur betrifft das meh üsi Hindere als d' Härze,
Zum Läse hett me die Zytig nid chönne benutze,
Doch ds Papier isch so zart gsi für ds Geischerfüüdle z' putze !

Jetz hett der Bürger d' Billettstüür emou begrabe,
Lustbarkeits-Stüür hett si gheisse, do geisch abe,
Was hett de Biel üs scho a Lustbarkeite bote ?
Syt viele Johrzähnte scho sy hie d' Bordell verbote !

Im letschte Summer hei mir gfreore wie ne More,
Hei üs d' Chappe müesse zieh bis über d' Ohre,
Sogar die Chäfer hei sich nid zum Loch uus lo locke,
Und sy im Beau-Rivage a'r Wäirmi blybe hocke !

Ogi, Ogi : O gib du üs e chly Vertroue,
Du wirsch de gnau nach Schlumpf die Bahn 2000 boue,
Doch wüsse mir nid, ob die Züg im Johr 2000 roue,
Oder ob si de zwöitüusig Johr dra boue !

O-la-la, c'est incroyable, ei-ei-ei-ei !
I gloube's nid, das git's jo nid, hei-ei-ei-ei !
Dänket nid, mir tüeng so bla-bla-Gschichte dichte,
So tuet ds Canal 3 vo de EHC-Mätsch brichte !

